

Los Chuetas de Mayorka

En uno de nuestros últimos programas aviamos kontado sobre una letra ke resivimos de uno de los Chuetas de Mayorka, los desendientes de los Djudios de esta isla de Espanya ke unos 5-6 siglos atraz se konvertieron al Kristianizmo, en segito a los masakros kontra de eyos, ma aun kon esto no fueron akseptados por los otros komo verdaderos Kristianos i fueron tenidos al margen de la sosiedad mayorkina.

Aun ke ya tenemos konosensia de estos faktos de una manera jenerala la letra ke resivimos arebivió muestra kuriozidad i empesimos a bushkar mas informasiones i detalyos a este sudjeto. Por muestra buena suerte, entre los livros ke mos fueron entregados ultimamente por uno de nuestros oyentes, topimos un muy interesante livro ke trata djuntamente de esta kestion: Es este el livro "Los Chuetas Mayorkinos" de Baltazar Porsel del kual damos aki en pokas palavras, los prinsipales puntos.

Los Djudios, es dicho en este livro, bivieron en Mayorka dezde largos siglos i ya ay prevas dokumentadas ke eyos se topavan ayi a lo menos dezde el siglo XII. Eyos se mantenian del komersio i de finansas (empres-tavan moneda), ma tambien de diversos ufisios i profesiones entre las kualas las de mediko i de kartografo.

(1) Del Programa "Sefarad" de la "Boz de Israel".

En 1931, en segito a la prova de la otoridades de kovrar mas i mas dasios en lo ke la situasion de los agrikultores iva de mal en peor, esbrochó una violente revolta de los kazalinos. El governador i sus partidarios se refujiaron en el kastiyo i de ayi reusheron a desviar la sanya de los revol-tados kontra los Djudios de la sivdad. Eynos fueron atakados i matados i sus kazas i butikas kemadas, sakadas i destruidas.

Aun ke pokos dias despues, las fuersas del governador reusheron a reprimir la revolta, no fue echo nada para kompensar a los Djudios ke avian sido sus viktimas. A la kontra, les fueron impozadas restriksiones diversas, entre otras la defensa de merkar o alkilar muevas kazas en lugar de las ke les avian sido kemadas o destruidas. La solusion ke les fue propo-zada para salir de sus apreto fue la konverson al Kristianizmo i uvo muchos ke, no viendo otro remedio, la akseptaron. Ma esta solusion no fue yenamente satisfaziante i los nuevos konversos fueron konti-nuados a ser mal vistos por el resto de la povlasion i por la Inkizision, kuando yegó a Mayorka unos 100 anyos mas tadre.

Ainda antes de esto, en 1435, kuando los pokos Djudios ke avian kedado fideles a sus relijion ya avian empesado a remetersen del masakro de 1391, una basha kalumnia solevantó otra vez a la povlasion kontra de eyos. Algunos de eyos fueron "djuzgados" i kondanados a ser kemados... Se kreó una tan fuerte panika ke todos los otros Djudios demandaron de ser konvertidos. Ma eyos tambien no alkansaron la paz i el repozo sino ke se djuntaron a los konversos de 1391, yamados "Chuetas" i enverso los kualos el resto de la povlasion manifestava despresio i inimistad.

Esta aktitud se kontinuó, kon altas i bashas, durante kaje todo el tiempo ke pasó dezde entonses. El periodo el mas duro fue el siglo XVII en el kual fueron echos numerosos autos-da-fé, i fueron kemadas diezenas de personas djuzgadas por la Inkizision i topadas kulpavles de aver obser-vado ainda siertos uzos djudios. Ma mizmo despues, kuando ya fue anu-lada la Inkizision i ke el rejimen se izo mas liberal, mizmo entonses la sosiedad Kristiana refuzó de admeter a los Chuetas komo korelijionarios kon yenos derechos, i los sometió a toda una seria de diskriminasionas.

Ma, apunta el autor, estos ultimos tiempos se esta notando un troka-miento, sovre todo komo konsekuensia del dezvelopamiento del turizmo. Para la djoven djenerasion en Mayorka ke esta anchenado sus kontaktos kon la muchidumbre de djente de diversas rasas, relijiones i kulturadas, ke yegan a la isla komo turistas, las superstisiones atadas a los Chuetas, las akuzasionas echas kontra de eyos dezde siglos, paresen agora ridikolas i inadmisibles, i poko a poko estan desapareciendo, aun ke ainda no al punto de ser kompletamente ulvidadas.